

I. DISPOSICIÓN XERAIS

MINISTERIO DE AGRICULTURA, PESCA E ALIMENTACIÓN

17136 *Real decreto 1450/2018, do 14 de decembro, polo que se modifica o Real decreto 38/2017, do 27 de xaneiro, sobre disposicións de aplicación da normativa da Unión Europea en materia de accións de información e promoción relativas a produtos agrícolas no mercado interior e en terceiros países.*

O Regulamento (UE) n.º 1144/2014 do Parlamento Europeo e do Consello, do 22 de outubro de 2014, sobre accións de información e de promoción relativas a produtos agrícolas no mercado interior e en terceiros países e polo que se derroga o Regulamento (CE) n.º 3/2008 do Consello, estableceu un novo réxime, máis eficaz e coherente, sobre as políticas de promoción e información tendo en conta a experiencia adquirida e as perspectivas de evolución do sector agrícola e dos mercados, dentro e fóra da Unión Europea.

En desenvolvemento do anterior, o Regulamento delegado (UE) 2015/1829 da Comisión, do 23 de abril de 2015, que completa o Regulamento (UE) n.º 1144/2014 do Parlamento Europeo e do Consello, sobre accións de información e de promoción relativas a produtos agrícolas no mercado interior e en terceiros países, e o Regulamento de execución (UE) 2015/1831 da Comisión, do 7 de outubro de 2015, polo que se establecen disposicións de aplicación do Regulamento (UE) n.º 1144/2014 do Parlamento Europeo e do Consello, sobre accións de información e de promoción relativas a produtos agrícolas no mercado interior e en terceiros países, establecen as condicións en que as accións de información e de promoción relativas a produtos agrícolas e de determinados produtos alimenticios a base de produtos agrícolas, levadas a cabo no mercado interior ou en terceiros países poderán ser financiadas, total ou parcialmente, con cargo ao orzamento da Unión Europea.

Para a aplicación en España da citada normativa, ditouse o Real decreto 38/2017, do 27 de xaneiro, sobre disposicións de aplicación da normativa da Unión Europea en materia de accións de información e promoción relativas a produtos agrícolas no mercado interior e en terceiros países.

O obxectivo destas accións de información e promoción é reforzar a competitividade do sector agrícola da Unión Europea e, de forma máis concreta, aumentar o nivel de coñecemento dos consumidores sobre as bondades dos produtos agrícolas e dos métodos de produción, así como incrementar o coñecemento e o recoñecemento dos réximes de calidade da Unión Europea.

Para tal fin, as axudas están destinadas ás organizacións profesionais e interprofesionais representativas do sector agroalimentario de ámbito nacional ou da Unión Europea, organizacións de produtores ou asociacións de organizacións de produtores e organismos do sector agroalimentario.

No caso destas subvencións, as institucións europeas, e en concreto a Axencia Executiva de Consumidores, Saúde, Agricultura e Alimentación (Chafea), dispoñen de competencias directas na aprobación e xestión das solicitudes de axuda presentadas polas organizacións propoñentes. Non obstante, determinadas actuacións neste procedemento son encomendadas pola dita normativa aos Estados membros.

Este sistema veu funcionando desde a aprobación dos citados regulamentos e real decreto. Non obstante, recibíronse indicacións da Comisión Europea a través do seu sistema de auditorías e controis no senso de introducir no seu réxime xurídico unha serie de especificacións concretas e puntuais co fin de garantir a optimización dos recursos públicos europeos e de asegurar o correcto encaixe do procedemento establecido no regulamento para garantir a seguranza xurídica dos destinatarios, facilitando ao propio

tempo ás solicitantes a correcta comprensión e cognoscibilidade do réxime xurídico que lles é de aplicación. Debe terse en conta que neste sistema de apoio é a Unión Europea quen realiza o groso das actuacións e dispón a orientación na súa execución e as prioridades que atender, xa que selecciona as propostas presentadas directamente polos peticionarios sen participación dos Estados membros e é do seu orzamento de onde parte o financiamento anexo ás axudas. Os Estados membros limitanse a exercer funcións concretas de supervisión, en cuxo seo a Intervención Delegada no Fondo Español de Garantía Agraria (FEGA) sinalou a conveniencia de proceder, en idéntico senso, ás modificacións que agora se operan.

Así mesmo, a presente modificación concreta en tres artigos determinados o novo réxime de relación electrónica dos interesados coa Administración, aplicable após a entrada en vigor da Lei 39/2015, do 1 de outubro, que obriga a adecuar o real decreto nese senso.

O contido deste real decreto axústase aos principios de boa regulación mencionados no artigo 129 da Lei 39/2015, do 1 de outubro, do procedemento administrativo común das administracións públicas. Así, de acordo cos principios de necesidade e eficacia, xustifícase esta norma na necesidade de establecer unha ordenación adecuada do sector agrícola. Cúmprese o principio de proporcionalidade e a regulación límtase ao mínimo imprescindible para aplicar a normativa da Unión Europea. En aplicación do principio de eficiencia, límtanse as cargas administrativas ás imprescindibles para a consecución dos fins descritos, sempre dentro do marco da Unión Europea. En aplicación do principio de transparencia, ademais da audiencia pública, durante a tramitación desta disposición foron consultadas as comunidades autónomas, así como as entidades representativas dos sectores afectados e os consumidores a través de distintos medios. E, en función do principio de seguranza xurídica, esta iniciativa é coherente con todo o ordenamento xurídico.

Na elaboración deste real decreto foron consultadas as comunidades autónomas, así como as entidades máis representativas dos sectores afectados.

Na súa virtude, por proposta do ministro de Agricultura, Pesca e Alimentación, coa aprobación previa da ministra de Política Territorial e Función Pública, de acordo co Consello de Estado, e logo de deliberación do Consello de Ministros na súa reunión do día 14 de decembro de 2018,

DISPOÑO:

Artigo único. *Modificación do Real decreto 38/2017, do 27 de xaneiro, sobre disposicións de aplicación da normativa da Unión Europea en materia de accións de información e promoción relativas a produtos agrícolas no mercado interior e en terceiros países.*

O Real decreto 38/2017, do 27 de xaneiro, sobre disposicións de aplicación da normativa da Unión Europea en materia de accións de información e promoción relativas a produtos agrícolas no mercado interior e en terceiros países, queda modificado como segue:

Un. Modifícase o artigo 6, que queda redactado como segue:

«Artigo 6. *Solicitudes.*

1. No caso de que a selección do organismo de execución se faga de forma previa á presentación da solicitude de axuda á Chafea, as entidades propoñentes deberán presentar unha solicitude de aprobación do proceso de selección do organismo de execución ante a Dirección Xeral da Industria Alimentaria.

Para isto disporán dun prazo de quince días hábiles contados a partir do fin do prazo de presentación de solicitudes previsto na convocatoria publicada pola Chafea.

2. No caso de que o organismo de execución non fose seleccionado previamente, a solicitude de aprobación do proceso de selección do organismo de execución presentárase en calquera momento unha vez que se seleccionase e, en todo caso, como data límite nun prazo de trinta días hábiles contados desde a data de recepción da notificación da decisión a que se refire o artigo 4.

3. No caso de que a entidade proponente teña asinado un contrato marco cun organismo de execución, deberá xustificar que existía un contrato marco plurianual previo, do cal deberá achegar copia. A solicitude de aprobación do proceso de selección do organismo de execución obxecto do contrato marco presentárase nun prazo de quince días hábiles contados a partir do fin do prazo de presentación de solicitudes previsto na convocatoria publicada pola Chafea.

4. A solicitude descrita nos números 1, 2 e 3 será presentada pola sede electrónica do Mapama conforme o modelo dispoñible no sitio web <http://www.mapama.gob.es/es/alimentacion/temas/promocionalimentaria/programas-de-informacion-y-promocion-de-productos-agricolas/> e acompañada da seguinte documentación:

a) Convocatoria. A convocatoria debe anunciarse en medios que permitan unha difusión universal; para isto deberase publicar durante un mes ao menos nas webs das entidades proponentes e/ou na web do Mapa. Así mesmo, a convocatoria debe detallar os criterios de selección, adxudicación e exclusión que se van aplicar, así como o calendario previsto do procedemento.

b) Descrición dos medios empregados para dar difusión á convocatoria (publicación en páxinas web ou xornais, envíos da convocatoria por correo electrónico e demais medios destinados a tal fin).

c) Copia de cada unha das propostas recibidas.

d) Criterios de exclusión. Os organismos de execución serán excluídos de participar no proceso de selección se están incursos nalgúns dos criterios de exclusión do artigo 71 da Lei 9/2017, do 8 de novembro, de contratos do sector público.

e) Criterios de selección aplicados. Estes criterios serven para valorar a capacidade operativa e financeira dos organismos de execución. Estes deben ser non discriminatorios e proporcionados ao proxecto que se vai desenvolver e determinan os organismos de execución que pasan á fase de adxudicación.

f) Criterios de adxudicación aplicados. Estes criterios serven para avaliar a calidade e pertinencia das propostas. O contido de cada proposta será puntuado de acordo cos criterios de adxudicación, de tal maneira que aquelas propostas que non alcancen os limiares mínimos serán rexeitadas. A oferta elixida representará a mellor relación calidade/prezo e a ausencia de conflito de intereses. Se a selección non recae na proposta económica máis vantaxosa, deberá xustificarse expresamente.

g) Documento que dea fe do proceso formal ou acta onde se adxudica a escolla, datado e asinado polo representante da organización proponente.

h) Documentación que acredite todas as comunicacións realizadas cos organismos de execución e a comunicación do resultado de cada fase do proceso de selección levado a cabo debidamente argumentado.

i) A identificación da/s entidade/s que intervirá/n eventualmente na execución das accións e descrición dos traballos que vai desenvolver cada unha delas.

5. No caso de que a entidade proponente execute determinadas partes dun programa, deberá presentar ante a Dirección Xeral da Industria Alimentaria, no prazo máximo de trinta días hábiles contados desde a data de recepción da notificación da decisión a que se refire o artigo 4, información acreditativa da súa experiencia no desenvolvemento de accións de promoción e descrición dos recursos de persoal e medios para a execución do programa.

6. A entidade proponente, segundo o disposto no artigo 68 da Lei 39/2015, do 1 de outubro, do procedemento administrativo común das administracións públicas, disporá dun prazo de dez días hábiles para emendar ou entregar os documentos preceptivos indicados anteriormente.»

Dous. Introdúcese un novo artigo 6 bis co seguinte contido:

«Artigo 6 bis. *Selección dos organismos de medición de resultados.*

1. No caso de que a contía do contrato sexa inferior a 15.000 € sen IVE, a selección poderase realizar mediante un procedemento sen publicación previa dunha convocatoria de licitación coa consulta de, como mínimo, tres candidatos. A selección do organismo de medición de resultados, entendido como organismo externo cualificado e independente encargado de avaliar os resultados do programa, farase sobre a base da mellor relación calidade/prezo e a ausencia do conflito de intereses.

2. No caso de que a contía do contrato sexa superior a 15.000 € sen IVE, a selección realizarase mediante un procedemento de licitación aberto e público e sobre a base da mellor relación calidade/prezo e a ausencia do conflito de intereses. Para isto, as entidades proponentes deberán achegar a documentación acreditativa descrita no número 4 do artigo 6.

3. As entidades proponentes presentarán ante a Dirección Xeral da Industria Alimentaria toda a documentación que acredite o procedemento levado a cabo en calquera momento durante a execución do programa e, en todo caso, antes de realizar a medición de resultados.

No caso de non se verificar a conformidade do procedemento, a Dirección Xeral da Industria Alimentaria comunicará este feito ao interesado e ao FEGA para efectos do pagamento correspondente.»

Tres. Modifícase o artigo 10.1, que queda redactado como segue:

«1. De acordo co artigo 13 do Regulamento de execución (UE) n.º 2015/1831 da Comisión, do 7 de outubro de 2015, nun prazo de trinta días naturais a partir da data da sinatura do contrato, o beneficiario poderá presentar ante o FEGA unha solicitude de pagamento dun anticipo, xunto coa fianza prevista no número 2. Conforme o disposto no artigo 14 da Lei 39/2015, do 1 de outubro, do procedemento administrativo común das administracións públicas, é obrigatoria a presentación electrónica da solicitude e da documentación correspondente, dispoñible na sede electrónica do FEGA, cuxo enderezo é <https://www.sede.fega.gob.es>, dentro da parte “Catálogo de servizos”.»

Catro. Modifícase o artigo 11.2, que queda redactado como segue:

«2. Estas solicitudes cubrirán os custos subvencionables en que se incorrese durante o ano en cuestión e deberanse acompañar da documentación relacionada no artigo 14, números 2, 3 e 4, do Regulamento de execución (UE) 2015/1831, do 7 de outubro de 2015. Conforme o disposto no artigo 14 da Lei 39/2015, do 1 de outubro, do procedemento administrativo común das administracións públicas, é obrigatoria a presentación electrónica da solicitude e da documentación correspondente, dispoñible na sede electrónica do FEGA, cuxo enderezo é <https://www.sede.fega.gob.es>, dentro da parte “Catálogo de servizos”.»

Cinco. Modifícase o artigo 12.2, que queda redactado como segue:

«2. A solicitude só se considerará admisible se vai acompañada da documentación relacionada nos números 3, 4 e 5 do artigo 15 do Regulamento de execución (UE) n.º 2015/1831 da Comisión, do 7 de outubro de 2015. Conforme o disposto no artigo 14 da Lei 39/2015, do 1 de outubro, do procedemento administrativo

común das administracións públicas, é obrigatoria a presentación electrónica da solicitude e da documentación correspondente, dispoñible na sede electrónica do FEGA, cuxo enderezo é <https://www.sede.fega.gob.es>, dentro da parte “Catálogo de servizos”.»

Disposición derradeira única. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 14 de decembro de 2018.

FELIPE R.

O ministro de Agricultura, Pesca e Alimentación,
LUIS PLANAS PUCHADES